

Date – 30/11/2024

Time - 18:30 -18:40Hrs

REGIONAL NEWS BULLETIN

HEADLINES (EVENING)

1. Chief Secretary Pu Khilli Ram Meena chuan kutthemthiamte tanpuina tura sorkar laipui scheme PM Vishwakarma chu mipuiin hlawk taka an hman theih nan Department te mipui hrilhhriat kawngah theihtawp chhuah turin a chah.
2. Mizoram sorkar hnuaiah thlaithar lei leh hralh chungchangah hmalakna kalpui tan a ni.
3. Prime Minister Narendra Modia chuan vawiin khan all India Directors General and Inspector General of Police Conference, Bhubaneswar-ah a hmanpui.
4. Union Finance Minister Nirmala Sitharaman chuan vawiin khan Credit Outreach Programme-ah loan cheng vaibelchhe 1121 chuang pekna lehkha mi sing nga chuang hnenah a pe chhuak.

<><><>

CS

Chief Secretary Pu Khilli Ram Meena chuan kutthemthiamte tanpuina tura sorkar laipui scheme PM Vishwakarma chu mipuiin hlawk taka an hman theih nan Department in mipui hrilhhriat kawngah theihtawp chhuah turin a chah.

Chief Secretary thar hian vawiin khan Aizawl Sipai Lammuala buatsaih PM Vishwakarma Exhibition-cum-Trade tlawhin, PM Vishwakarma thil tum chu a hlawhtlin theih nan leh hmun kilkhawr zawk a thlen theih nan theihtawp chhuah turin thawktute a chah a, Bank hrang hrang te pawhin Loan hmanga kutkawih eizawna bultan duh te pui turin theihtawp chhuah an ngai tih sawiin hmasawn tum duh te pui turin a chah bawk.

Chief Secretary chuan bultan mek te mamawh leh pawimawh zingah tharchhuah hralhchhuahna tur ngaihtuah a ni a ti a, theihtawp chhuahpui tura department te hrilhin sawrkar leh mipui thawhona tha awm tura tan la thar theuh turin a chah bawk.

PM Vishwakarma hi nikuma Prime Minister Narendra Modi-a'n a tlangzarh tawh kha a ni a, sorkar laipui hmalakna niin kutthemthiamna kawng hrang hranga thil siam chhuak thei, thiamna neite bul tanna leh an kal zelna atana tanpuina leh khaichhuahna atan a bik taka duan a ni.

Mizoramah atang pawhin loan dil hi mi eng emawzat an awm tawh a, mi pali hnenah pek chhuah a ni tawh. Tun tum Exhibition cum Trade Fair-ah pawh hia mahni kut themthiam thil pho chhuak mi 41 an awm a, an vaiin Certificate leh Memento hlan vek an ni.

PM Vishwakarma Exhibition hi Mizoramah chuan Commerce & Industries Department chu Nodal Department niin, MSME DFO te nen an thawk ho a, hrechiang duh chuan Project Management Unit (PMU) C71 Department leh Secretariat lamah te ngaihven theih a ni bawk.

<><><>

CM

Chief Minister Pu Lalduhoman vawiin khan Aizawl Zarkawta awm Carson Theological College & Seminary te College Graduation Day vawi 10-na chu Zarkawt Community Hall-ah a hmanpui.

Chief Minister chuan, Chin Hills a Missionary lut hmasa ber Rev. Arthur E. Carson te hming chawia din Carson Baptist Church ten Pathian thu zirna leh chanchintha thehdarhna kawnga hma an lakna fakin, thalai tam takten sual kawng zawh a, nun dan tha lo tak taka an nun lai a, helaiah thalai engemawzatin rawngbawl tura an lo inzir mup mup mai chu hmuh a nuam a ni, a ti. Carson Theological College & Seminary kal zelna turah duhsakna hlanin, Pathian zawn chhuah zofate tan Pathian rawngbawl hi malsawmna hnar a ni, a ti.

Theological College & Seminary ah hian zir lai naupang 30 vel an kal thin a. A tam ber hi Tripura, Bangladesh leh Myanmar atanga kal an ni thin. Tun kum an academic session-ah hian zir lai naupang 16 an pass a ni.

<><><>

PUCC

Thla thar ni 9 atanga ngaihnamna tellova lirthei endik hna Traffic Police ten an kalpui dawn avangin, tunlai hian lirthei khu endikna hmun a lun thei hle a,

Akashvani News Aizawl zawhna chhangin vawiina MINECO-a Lirthei khu endiktute chuan, Sorkar in ngaihnamna tel loa lirthei endik tur thu a puan hnuah lirthei khu endik tur an pung hluai tih an sawi a, a hma chuan ni khatah chawhrualin lirthei 150 vel an endik thin laiin, tunlaih chuan ni khatah lirthei 300 vel an endik thin niin an sawi.

Tun dinhmunah Aizawl khawpui huam chungah hian lirthei khu endikna pali a awm mek a, MINECO, Hlimen, Rangvamual leh Zemabawka te sorkar hriatpuiin a endik theih a, hei bakah hian hmun thenkhatah mimala endikna siam an awm baw.

Hemi chungchanga kan corr report lo ngaithla ang.

(Vawiin Inrinni hi sorkar pisa chawlh ni mah se Aizawl ah chuan MINECO leh Zemabawka Mizoram Pollution Control Board motor khu endikna hmun te chu hawn a ni a, hei bakah hian mipui mamawhna avangin Chhinga Vengah hawn belh a ni baw.

Lirthei khu endik man hi Two wheeler tan Rs 60 a ni a, motor diesel hmang tan Rs 150 niin petrol hmang tan Rs 120 a ni thung. Truck lian endik man chu Rs 200 a ni a, Auto-rickshaw endik man chu Rs 80 a ni baw. No Tolerance Drive hman la ni lo mah se Traffic Police te hian nitin in lirthei hi an endik reng tho a, nimin khan Aizawla Traffic Rules bawchhia man nualin an mante hi Two Wheeler 24 leh LMV 6 te a ni a, pawisa chawitir zat chu sing 2 sang 2 za nga a ni.)

No Tolerance Week hi Mamit District-ah chuan kalpui tawh niin, nimin khan Mamit khawpui chung hmun 4-ah lirthei vei vakte endik a ni a, Mamit SP Pu Pukhraj Kamal chuan Krismas leh kumthar mipui te'n hlim leh thlamuang taka an hman theih nan dan phalloh thil chi hrang hrang leh mipui nun ti ralmuanglote ven nan endikna chu kalpui a nih thu a sawi.

Nimina Lirthei 329 endikah hian mi 29 chu chawitir an ni a, an pawisa chaw tlingkhawm hi cheng singthum sangriat a ni.

<><><>

NERACE

Mizoram sorkar hnuaiah thlaithar lei leh hralh chungchangah hmalakna kalpui tan a ni a, tukin atang khan North Eastern Region Agri Commodity e-connect (NERACE) leh Mizoram Agricultural Marketing Board (MAMB) te tangkawp chuan Dungtlang Khua, Champhai District a sawhthing thianghlim leh fai tha Grade-A, Matric Ton 11 chu Hliappui Self Help Group (SHG) VO1 Ginger Processing Unit hnen ah an hralh.

Hliappui SHG hian heng Sawhthing te hi a tul angin an sawngbawl dawn a ni. NERACE hian Sawhthing mai bakah Hmarcha lei leh hralh thuah Online kal tlanga a leitu tur leh a thartu -farmer society te thlun zawm turin hma an la mek a. Mizoram Agricultural Marketing Board-te nen thawk hoin Mizoramin Sawhthing a thar chhuah ang angte man man zawk a hralh a nih theih nan hma an la mek a ni.

<><><>

CHHIMTUIPUI WILDLIFE DIVISION

Chhimbauipui Wildlife Division Deputy Conservator of Forest chuan tunhnaia Sanghal awktu chu cheng sing 2 a chawitir.

Lawngtlai District Mampui khuaa loneitu pakhatin, a thlam bul hnaia Thang a kamah tunkar Nilaini khan Sanghal a awk tih Forest Department lam chuan hriain an chhuizui nghal a, Sanghal awktu hnen atang hian Sanghal Sarep hrang 26, Sanghal lu leh a ke pathum mansak niin, he thu kalzel ah hian Deputy Conservator of Forest, Chhimbauipui Wildlife Division, Lawngtlai chuan The Wildlife Protection Act 1972 tlawhchhanin Sanghal awktu hi cheng sing 2-a chawitir.

Sanghal sa an man te hi Deputy Conservator of Forest, Chhimbauipui Wildlife Division, Lawngtlai Office bul ah halral niin, nungcha humhalh kawngah mitinte tanla sauh sauh turin thawktute chuan an ngena, dan kalh chete hrem an nihtheih nan an mahni tanpui thintute chungah lawmthu an sawi.

<><><>

AGRICULTURE MINISTER

Agriculture, Irrigation & Water Resources leh Cooperation Department Minister Pu PC. Vanlalruata'n Thenzawl Dragon Fruit Growers & Marketing Society General Assembly Vawi 4-na a hmanpui.

Minister chuan thu sawiin Zau ang zawnga hmalak chu sawrkar auhla a nih angin kalpui an tum tih a sawi a, sawrkar tan a model ni thei tura Lamlian Dung Zau a Thenzawl Dragon Fruit Growers & Marketing Society te hmalakna chu fakawm a tih thu a sawi. Local Soda Pvt.Ltd te nena thawhona thuthlung an ziaak pawh Minister chuan lawmawm a tih thu sawiin, kuthnathawktuten thei leh thlai an tharchhuahte chu thei tui emaw wine a siamchhuah a nih theih nan dan siamthat tum mek a ni tiin Food Processing lama hmalak an tum dan a sawi a. Kuthnathawktuten man man zawka an tharchhuahte an hralh theihna tura hmalak chu sawrkarin a tum ber niin, ZPM sawrkar chuan kuthnathawktute a dah pawimawh ber a, kuthnathawktute lamah sawrkar a tang tlat dawn tih a sawi a, thawhona tha tak an neih a pawimawh thu a sawi bawk.

Thenzawl Dragon Fruit Growers & Marketing Society ten kum tina an hman thin General Assembly hi Lamlian Dung Zau ah hman niin Thenzawl Dragon Fruit Growers & Marketing Society Chairman Tv C. Lalrinthanga chuan a kaihruai a, Lamlian Dung zau kawng laih tur chungchang leh tuikhuah tur chungchang report ngaihthlak a ni bawk.

Minister Pu PC. Vanlalruata hi Pu Lalmuanpuia Punte Adviser to CM, Aizawl South III Bialtu MLA Pi Baryl Vanneihsangih leh South Tuipui Bialtu MLA Pu Jeje Lalpekhlua ten an tawiawm a ni.

<><><>

AIR ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

<><><>

PM

Prime Minister Narendra Modia chuan vawiin khan all India Directors General and Inspector General of Police Conference, Bhubaneswar-ah a hmanpui. He Conference hi Union Home Minister Amit Shah bakah Principal Secretary to the Prime Minister PK Mishra te, National Security Advisor Ajit Dovalte, Union Home Secretary, State leh UT Director General leh mi pawimawh tak takte an tel a ni.

Conference ah hian ramchhung himna lamte, criminal law tharte, coastal security, cybercrime, Maoist buaina, leh technology thar avanga harsatna hrang hrang thlang mekte sawiho a ni a. Firfiakte do letna tur ruahmanna te ngaihtuah a ni bawk.

<><><>

UNION FINANCE MINISTER

Union Finance Minister Nirmala Sitharaman chuan vawiin khan Credit Outreach Programme-ah loan cheng vaibelchhe 1121 chuang pekna lehkha mi sing nga chuang hnenah a pe chhuak. Heng loan te hi sawrkar laipui scheme hrang hrang PM SVANIDHI, PM Vishwakarma, MUDRA, Stand Up India leh Kisan Credit Card scheme te a ni.

Union Finance Minister Sitharaman-i chuan Madhubani district-a Jhanjapur-ah he hun hi a hmang a. Kum 2047-a ram changkanga India siamna kawngah hmeichhiate chuan hmasawna an nawrkal nasa dawn a ti a. Drone Didi programme hnuaiakh Lakapati Didi tam zawk din turin tan lak a ni ang tih sawiin Prime Minister beiseina chu hmeichhiate hmahruainaa hmasawna kalpui a ni a ti.

<><><>

ADB

Sawrkar laipui leh Asian Development Bank (ADB) te chuan loneitute thlai chinnaa natna hrik tello hmanrua leina atan loan dollar maktaduai 98 lakna tur an inrem. He loan hian thlai thar tam kawngahte, thlai thatna tur leh sik leh sa avanga buaina thlang thei laka venna tur a ni a. Building India's Clean Plant Programme hi

**Department of Economic Affairs Joint Secretary leh ADB India
Resident Mission Officer-in-charge ten an ziaak a ni.**

<><><>